

Director di Departamento Relacion Exterior di Aruba, sr. Edwin Abath

Consul Rosario de Rosa ta conoce batimento di curason di e Dominicanonan na Aruba

ORANJESTAD – Dialuna atardi miembronan di e Cuerpo Consular di Aruba a dispidi di sra. Joselyne Rosario de Rosa kende pa 8 aña a fungi como Consul di Republica Dominicana na Aruba.

Durante un recepcion cu a tuma luga na Centro Kibrahacha e diplomaticonan a comparti gestonan di aprecio cu nan colega Dominicano, kende lo asumi un posicion nobo como minister consehero den embahada Dominicano na Guatemala.

Sra. Rosario de Rosa a bisa cu su mayor experiencia y satisfaccion na Aruba tabata esun di representa e estado Dominicano durante tur e añanan aki. “Esaki ta un parti di mi bida. Nan ta 8 aña caminda mi a comparti momentonan di hopi emocion cu henter un comunidad Dominicano ehemplar y trahado. Un comunidad Dominicano cu a bisa mi: Consul a



bo ta nos mama”, el a bisa. E diplomatico cu hopi nostalgia a declara: “Na Aruba mi ta laga atras un gran famia”. Departamento Relacion Exterior
Director di departamento di Relacionnan Exterior, sr. Edwin Abath a referi na Bon Dia Aruba riba e cualidadnan personal y profesional di e diplomatico Dominicano.
“Den e caso di sra. Consul Joselyne, nos ta papia di un Consul General hopi dinamico. Un persona cu ta biba meymey di su comunidad.

E ta conoce e batimento di curason di e pueblo Dominicano na Aruba”, asina e halto ehecutivo di gobierno a bisa. El a añadi cu a base di su cualidadnan sra. Rosario de Rosa a sa di representa dignamente y di forma ehemplar e comunidad Dominicano na Aruba. El a indica cu un consul estableci den un pais ta e horea, wowo y e sinti di su pueblo mes y di su pais. Den nan reunion cu nan a yega di sostene y den e celebracion oficial di Republica Dominicana su dia di independencia, sra.

Rosario de Rosa a sa di trece su palabranan di un forma hopi bunita y cu balor. “P’esey mes nos ta bay haya su falta y ohala cu esun cu ta sigui su persona lo por haci e mesun papel of miho”, el a bisa. Sr. Abath a bisa cu e forma con sra. Rosario de Rosa ta bay laga e Consulado Dominicano actualmente ta den un forma hopi top y ta dificil pa bo supera esey. Gobierno Dominicano a nombra sr. Alfredo Mateo Sabala como Consul General di Republica Dominicana na Aruba den

reemplazo di sra. Rosario de Rosa. El a bisa cu un Consul no t’ey solamente pa representa su pueblo pero tambe pa busca oportunidad entre su pueblo y e pais unda e ta sirbi. Den e caso di sra. Consul Dominicano saliente, el a sa di cumpli cabalmente di un forma “tremendo” pa estrecha e lasonan bilateral entre su pais y Aruba. “Nos tabatin semper masha bon contacto mes cu Consul Joselyne. No ami so pero dos di mi antecesoran tambe ...”, el a bisa.

Sr. Abath a desea Consul Rosario de Rosa hopi exito y felicidad den su tarea cu e ta bay realisa na Guatemala. “Di parti di departamento di Relacion Exterior nos ta desea su persona hopi exito, hopi felicidad y dicha y cu nos Creador por guia su pasonan pa representa su pais di un forma digno y ehemplar manera el a haci na Aruba”, director di Departamento di Relacion Exterior di Aruba a bisa. □

